

植物名實圖考

三十

植物名實圖考卷之二十七

固始吳其濬著

蒙自陸應穀校刊

羣芳

藍菊

玉桃

蜜萱

滿天星

淨瓶

蔦蘿松

如意草

金箴

鐵線蓮

金絲桃

水木樨

千日紅

萬壽菊

虎掌花

野茉莉

荷包牡丹

翠雀

秋海棠

金雀

金錢花

玉蝶梅

吉祥草

松壽蘭

貼梗海棠

望江南

盤內珠

半邊月




藍菊

藍菊蒿莖菊葉先菊開花亦如千瓣菊有紅白藍三色種亦有粗細以藍色爲秋菊所無故獨以藍著其早者六月中開故又呼六月菊花鏡藍菊翠藍黃心似單葉菊但葉尖長邊如鋸齒不與菊同



玉桃


玉桃葉如芭蕉抽長莖開花成串花苞如小綠桃花開露瓣如黃蝴蝶花稍大偶一有之故人罕見花鏡有地湧金蓮差相彷彿





蜜萱

蜜萱萱之蜜色者花葉俱細弱不易植






滿天星

滿天星野菊中之別種密瓣無數大於野菊或謂黃菊不摘頭則瓣小花多然菊中自有一種千瓣小菊雖摘頭亦如此



淨瓶

淨瓶細莖長葉如石竹開五瓣粉紫花如洋長春而花跗如小
瓶甚長故名





鳶蘿松

鳶蘿松蔓生細葉如松鍼開小筍子花似丁香而瓣長色殷紅
可愛結實如牽牛子而小



如意草

如意草鋪地生如車前開圓瓣翠藍花有柄橫起如翠雀而小

